

**Date – 05/02/2025**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

- 1. Akashvani Aizawl buatsaih Voice of Youth : Tukram Rimawi Musical Concert chu vawiin khan Operation Kingdom Ministry (OKM) Home Phunchawng ah hman a ni.**
- 2. Union Budget 2025-26 pharh takah Hmarchhak state hrang hranga Railway hmasawna tur cheng vbch 10,440 dah a ni.**
- 3. Delhi Assembly inthlanah hriat theih chinah tlai dar 3 thleng khan vote zaa 46.55 a tla.**
- 4. Prime Minister Narendra Modia chuan vawiin khan Prayagraj-a Mahakumbh neih mekah Triveni Sangam-ah a inchiah.**

**<><><>**

### **VOICE OF YOUTH : TUKRAM RIMAWI**

**Akashvani Aizawl buatsaih Voice of Youth : Tukram Rimawi Musical Concert chu vawiin khan Operation Kingdom Ministry (OKM) Home Phunchung ah hman a ni.**

**Tukram Rimawi hi Director leh Mizoram Cluster Head Pu DR Lalropuia chuan a hmanpui a, thusawiin Director chuan Radio lungphum mipuite hrih hriat, zirtir leh an duhzawng chhawpchuah ani a ti a, kalkhawmte chu hlim taka hun hmang tura chahin Viksit Bharat hlawhtlin nan hrisel taka dam rei a pawimawh tih a sawi.**

**Vawiina hun hmanah hian Asst Director, News Pu Gin Gangte, Asst Director, Program Pu Samuel Z. Hrangate chuan hman puiin Programme Executive Youth Forum Section Pu NH Ringa Tara te an tel a, Mi 400 vel he hunah hian hun an tel a ni.**

**Akashvani Aizawl Musical Programme Tukram Rimawi ah hian thusawi hrang hrang bakah zaithiam lar tak tak ten zaiin kalkhawm te an awi a ni.**

**<><><>**

### **MNF PRESS CONFERENCE**

MNF chuan Mizorama VC member sanghnih zali chuang leh LC member zathum sawmruk chuangte hun thla ruk chuang zet chhuhsak chu engti kawng maha sawi mam theih a ni lo a, Khawvela thleng ngai lo thutlukna nunrawng tak a ni, an ti.

He thu hi vawiina Aizawl Press Club-a thuthar thehdarhtute an kawmna ah sawiin MNF Legal Board Secretary David R Lalsawmtluanga chuan ZPM sorkarin VC te chu party dang an nih avang ngawta a dissolve na High Court - in a hnawl sak hriat in ZPM sorkarin lalna leh thuneihna an duh zia a nemnghet zel a ti a, VC thiah takte thiah chhan nen, thutlukna siam chhan in ang, itsikna leh lalduhna atanga lo chhuak ve ve niin a lang a, Zirlai naupangte exam hun lai, chhungtin kan buai em em lai taka VC leh LC inthlan hun an han ruat tlatte hi mak kan ti a, Zirna ngaihsak miah lo sum leh thuneihna atchilh sorkar dik tak a ni a ti.

Pu David Lalsawmtluanga chuan Champhai leh Khawzawl District-ah ringawt VC 5, Ngur, Hnahlan, Thekpui, Zawlsei leh Sialhawk VC te awm tha hle hle lai an namthlu ringawt a ti a, an sorkar tuk lawkah Ngur VC an thiat a, mipui court-ah ZPM sorkar duh dan takin Bye election hmanga fiah a ni a, itsikna nena an thiah tak MNF Party tho chuan mipui khawngaihna dawngin hnehna sang tak neiin VC an siam tawh a. Tihsual nei pawh ni loa itsikna leh lal duhna vang ringawta namthlukte an nih avangin VC pathumte chu High Court-ah an zualko leh a. Dikna tiang hmangin Gauhati High Court, Aizawl Bench chuan Hnahlan leh Thekpui VC chungchang a ngaihtuah fel a, VC thiah dan hi leilung pianken rorelna dik, Principles of Natural Justice kalh a ni tih High Court chuan sawiin, VC thiahna thupek chu a sut nghal a, a hnawl bakah heng VC te hian an hna pangngai an chhunzawm lehnghal theih nana hma la turin sorkar thuneitute a hriattir nghal bawk a ni a ti.

Hetiang High Court thupek awm reng chung a thuneihna an la hlan let duh lo hian High Court an zah lo hle tih leh lalna leh thuneihna atchilh an nihzia a tilang chiang hle bawk a, rang taka Court thupek anga VC te thuneihna hlan let vat turin an phut tih a sawi a ni.

MNF Legal Board Secretary sawi danin tun hnaia Food Civil Supplies and Consumer Affairs Department thuchhuahin chhungtin Ration Card-ah e-KYC ti vek tur leh tun thla chhunga ti hman lote chu ration card atanga paih vek tura Mizo mipuite an vau chu pawl an tih thu sawiin mipui rorelna langsar taka a beih chhunzawm niin a sawi bawk.

<><><>

## BUDGET FOR RAILWAY

Tun thla February ni 1-a Finance Minister Nirmala Sitharaman in Union Budget 2025-26 a pharh ah Hmarchhak state hrang hranga Railway hmasawna tur cheng vbch 10,440 dah a ni.

He thu hi Ashwini Vaishnaw, Railways Information & Broadcasting and Electronics bakah Information Technology changtu Minister in Thawhtanni-a thuthar thehdarhtute a kawmna ah a sawi a, Minister chuan ramchhungah railway hmasawna tam tak a thleng dawn tih sawiin hei hian bungraw changkang zawk, mipui tana him zawk leh nuam zawk a siam dawn a ti a, Vande Bharat train 200, Amrit Bharat train 100 leh Namu Bharat train 50 te chu hmachhawp zinga mi a ni tih sawiin heng rel thar te hi mipui mimir ban

phak tura duan a ni a ti a, kawngchhawnga rel kal tir na tur pawh ngaihtuah niin hmun 1000 ah siam tum ani a ti bawk.

Minister sawi danin hmarchhak state-an railway hmasawna tam tak a thleng mek a ti a, hmarchhak state ram hrang hrang chu tlawh pawh harsa ni mahse project hrang hrang chu chak taka kalpui a ni tih sawiin thenkhat chu an zo fel dawn tawh tih a sawi.

*Byte....Railway Minister*

He hunah hian Northeast Frontier Railway hnuai Rail station hrang hrang 92 te chu Amrit Bharat Station Scheme hnuai thuam chak tura hmalakna kalpui anih tur thu tarlan a ni a, Bairabi – Sairang project chu kumin July thlaa zawh fel tura ruahman a ni bawk.

<><><>

## HEALTH

Sik leh sa leh boruak inthlakin hriselna a nghawng dan chungchange, hemi laka invenna tur leh boruak/leilung tichhe lo tura tih tur hrang hrangte inzirtirna, National Health Mission hnuai National Programme on Climate Change and Human Health (NPCCHH) buatsaihin vawin khan neih a ni a,

Aizawl East leh Aizawl West district huam chhunga Health & Wellness Centre hrang hranga Health & Wellness Officer-te leh Medical Officer (AYUSH) te tan Training hi buatsaih a ni a. He Training hi Dr. Eric Zomawia, Mission Director, National Health Mission chuan a hmanpui a ni.

Dr. Eric Zomawia chuan NHM chu mi zawng zawng banphak a nih thu sawiin, mitin chhawr theih tur leh man tlawm zawka inenkawlina tha zawk siam kawnga hmalatu a ni, a ti a. Hospital hrang hranga a thlawna inenkawlina tam zawk a awm theih nana hmalak a nih thu leh, Mizorama Damdawiin hrang hrang 19 te India rama damdawiin tha bika thlan an nih tawh thu sawiin, Sub-Centres, Health & Wellness Centre, Primary Health Centre, Community Health Centre leh Urban Primary Health Centre-te Hospital lian zawk pan ngai lova changtlung zawk leh tha zawka thuam that anih thu a sawi a. Thawktute chu ram leh mipuite tana theihtawp chhuaha taima leh rinawm taka thawk zel turin a fuih a ni.

Dr. Vanlalrengpuia Chinzah, State Nodal Officer, NPCCHH, NHM chuan thusawiin, Sik leh sa inthlak avanga danglamna hrang hrangte chu sorkar hnathawkte chauh ni lovin mipuite'n tangruala an hmachhawn tur thil pawimawh tak a ni, a ti a. Sorkar hospital leh inchungkhura boruak chhia chi hrang hrang siam theite ti tlem tur zawnga hmalakte, tawih theilo bawlhhlawh leh vawi khat hman plastic-te ti tlem tura hmalak a ngaih zia he hnah hian a sawi bawk a ni.

Training chhimtu Health & Wellness Officer leh Medical Officer-te hian anmahni Centre theuha ASHA leh Jan Arogya Samiti (JAS) member-te training an pe chhawng ve leh dawn a ni.

<><><>

## HNAHTHIAL COLLEGE LITERARY FESTIVAL

Govt Hnahthial College Literary Festival ni khatna chu vawiin khan an College Auditorium-ah neih a ni a, Hnahthial Bawrhsap, Pi Rita Lalnunmawii Pachuau chuan a hmanpui a. 'Mizo History leh Sailo Lal Ropuite: Vandula leh Ropuiliani' lekhhabu chungchang Research team-te hnen atanga ngaihthlak niin MAL book of the year, 2023 - Pangparhnima ziaktu, Pi Ahmangaihi Kiangte kawmna hun neih a ni bawk.

Bawrhsap chuan tunlai, lekhhabu chhiartu tlakhniamna khawvelah ziak leh chhiar tuai thar leh tura Literary Festival buatsaih a ni leh a buatsaihtu, Literature Club din a ni te chu lawmawm a tih tak zet thu a sawi a. He huna ziakmi kalte chu a hlut tak zet a ni a ti a, Hnahthial tana mi hlu leh ropui tak mai, Lalnu Ropuiliani chungchang Research neih a ni thei chu lawmawm a tih thu a sawi.

GHC Literary Festival hi Literature Club, Department of English leh Mizo tangkawpin a an buatsaih niin Club din tirh, 2023 atang khan kum tin Festival hi buatsaih thin a ni. Tun kum Literary Festival hi ni hnih aw h tur a ni dawn a, he hunah hian Sub Hqrs Young Mizo Association (YMA) hruaitute, Denglung YMA-te, Village Council hruaitute, Mizoram Journalist Association (MJA) member-te, MZP hruaitute, ziakmi te, sawm bikte leh college zirlaite an tel a ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## DELHI ELECTION

Delhi Assembly inthlanah hriat theih chinah tlai dar 3 thleng khan vote zaa 46.55 a tla. Puan tawh angina tukin dar 7 atang khan Member 70 awmna Delhi Assembly inthlan vote thlak a ni a. Tlai dar 6 thleng khan vote thlak a ni a. Inrinniah vote chhiar a ni ang.

Inthlanna felfai leh tluang tak neih anih theih nan ruahmanna siam a ni a. Polling booth sing 1 sang 3 leh 700 chuang siam a ni a. Heng zinga Polling Station 70 hi hmeichhiaten an enkawl a ni a. Election Commission chuan inthlan buaipui turin mi nuai khat leh sing riat chuang a ruat a ni.

Delhi Assembly ah hian vote nei vaibelchhe 1 leh nuai 56 chuang an awm a. Tun tum inthlan hi kil thum atanga inchuh niin BJP, AAP leh Congress Party ten inthlan hi an chuh a. Candidate 699 an awm a. Candidate langsar zingah Aam Aadmi Party National convenor Arvind Kejriwal, Delhi CM Atishi, leh Delhi Minister Gopal Rai, BJP atangin Vijender Gupta, Pravesh Verma, Ramesh Bidhuri, leh Kailash Gahlot. Congress atangin Sandeep Dikshit, Haroon Yusuf leh Alka Lamba-te an tel a.

President Droupadi Murmu, Vice President Jagdeep Dhankhar, Chief Justice of India Sanjiv Khanna, Union Ministers Dr S Jaishankar, leh Hardeep Singh Puri, Senior Congress leader Rahul Gandhi, Chief of the Army Staff

**General Upendra Dwivedi, Delhi Lieutenant Governor Vinai Kumar Saxena, leh Delhi Chief Minister Atishi te chuan vawiin khan vote an thlak a ni.**



#### **PM MAHAKUMBH**

**Prime Minister Narendra Modia chuan vawiin khan Prayagraj-a Mahakumbh neih mekah Triveni Sangam-ah a inchiah. Social media-a a tarlan danin PM Modia hian Sangam-a inchiah chu thlarau khawvel nena inpawhna a ni a ti a. He tuia lo inchiah tawh vaibelchhe chuangte ang bawkin ani pawhin pawlna thar a dawn thu a sawi a. Maa Ganga chuan ramchhung mite chu remna, finna, hriselna leh muanna nen mal a sawm dawn a ti bawk. Kan Corr report ilo ngaithla ang u.**

